



# BOP

LUNES, 31 DE MARZO DE 2014

Nº 074

## DIPUTACIÓN DE LUGO

[boletin@deputacionlugo.org](mailto:boletin@deputacionlugo.org)  
[www.deputacionlugo.org](http://www.deputacionlugo.org)

Dep. Legal: LU-1-1968

Administración: San Marcos, 8 - 27001 Lugo  
Tel.: 982 260 124/25/26 - Fax: 982 260 205

### CONCELLOS

#### BARREIROS

##### Anuncio

Por Acordo Plenario de data de 27 de xaneiro de 2014, aprobouse inicialmente a **modificación da Ordenanza municipal do servizo de axuda no fogar** e, ó non terse presentado reclamacións durante o período de información pública, a aprobación provisional adquire o carácter de DEFINITIVA, polo que, de conformidade co artigo 70.2 da Lei 7/85, de 2 de abril, Reguladora das Bases de Réxime Local, procedese á publicación do texto íntegro para a súa entrada en vigor:

#### **“ORDENANZA MUNICIPAL REGULADORA DO SERVIZO DE AXUDA NO FOGAR DO CONCELLO DE BARREIROS**

##### **EXPOSICIÓN DE MOTIVOS**

A Lei 7/1985, de 2 de abril, reguladora das bases de Réxime Local (BOE nº 80, do 3 de abril de 1985), establece no seu artigo 25.2.k) que os concellos exercerán, en todo caso, competencias nos termos da lexislación do Estado e das Comunidades Autónomas en materia de prestación de servizos sociais e de promoción e inserción social.

A Lei 13/2008, de 3 de decembro, de servizos sociais de Galicia, regula o dereito de todas as persoas aos servizos sociais, correspondéndolles, aos poderes públicos, garantir este dereito, posibilitando así que as liberdades e igualdades entre individuos sexan reais e efectivas, tal e como consagra a propia Constitución Española.

A Lei 13/2008, de 3 de decembro, de servizos sociais de Galicia, establece no seu capítulo II, o catálogo de servizos sociais, onde define o servizo de axuda no fogar como un servizo consistente en ofrecerlles un conxunto de atencións ás persoas ou familias no seu propio domicilio, para facilitar o seu desenvolvemento e permanencia no seu contorno habitual. Esta mesma lei establece no seu artigo 11.f) que é función dos servizos sociais comunitarios básicos a xestión da axuda no fogar.

Coa entrada en vigor da Lei 39/2006, de 14 de decembro, de Promoción da Autonomía Persoal e Atención ás persoas en situación de dependencia, así como a normativa estatal e galega que a desenvolve, fíxose necesario establecer un novo marco regulador de carácter básico dos contidos, formas de prestación e aspectos procedementais e organizativos de axuda no fogar de maneira que coa aprobación da Orde do 22 de xaneiro de 2009 pola que se regula o servizo de axuda no fogar, se estableceron pautas de carácter xeral para asegurar un nivel equitativo de atención a todas as persoas que tiñan limitada a súa autonomía persoal.

O Decreto 254/2011, do 23 de decembro, polo que se regula o réxime de rexistro, autorización, acreditación e a inspección dos servizos sociais en Galicia, establece no seu artigo 7. b) como requisito xeral dos centros e programas de servizos sociais, dispoñer dunhas normas de funcionamento, visadas polo órgano competente, en materia de autorización e inspección de servizos sociais, da Xunta de Galicia, que garanta o respecto ao dereito das persoas usuarias e establezan as condicións de prestación e desenvolvemento dos servizos.

Coa aprobación e publicación do Decreto 99/2012, do 16 de marzo, polo que se regulan os servizos sociais comunitarios e o seu financiamento, faise necesario adaptar a normativa municipal existente en materia de axuda no fogar co fin de dar cumprimento ao establecido na disposición derradeira primeira do citado decreto.

O Decreto 149/2013, do 5 de setembro, polo que se define a carteira de servizos sociais para a promoción da autonomía persoal e a atención ás persoas en situación de dependencia e se determina o sistema de participación das persoas usuarias no financiamento do seu custo, dálle unha nova redacción aos artigos 14.2, 59 e 61 do Decreto 99/2012, do 16 de marzo, polo que se regulan os servizos sociais comunitarios e o seu financiamento, polo que se fai necesario adaptar a normativa municipal existente en materia de axuda no fogar ao establecido nos mencionados artigos.

En consecuencia e coa finalidade de garantir unha equidade, calidade e intensidade homoxéneas nos tipos de atención e os criterios de participación económica das persoas usuarias, o Concello de Barreiros, de

conformidade co marco normativo referenciado que confire aos concellos a potestade regulamentaria, e de autoorganización dentro da esfera das súas competencias, regula os requisitos e condicións da prestación do servizo de axuda no fogar municipal, a través da presente Ordenanza.

## CAPÍTULO I. DISPOSICIÓNS XERAIS

### Artigo 1º.- Obxecto

Esta Ordenanza ten por obxecto o desenvolvemento do servizo de axuda no fogar no Concello de Barreiros. Este servizo poderá prestarse ben directamente ou ben a través das diferentes modalidades de contratación da xestión de servizos públicos previstas na normativa vixente de contratos do sector público e de conformidade coas especificidades estipuladas na Lei 13/2008, de servizos sociais de Galicia, e no Decreto 99/2012, do 16 de marzo polo que se regulan os servizos sociais comunitarios e o seu financiamento, para os diferentes servizos e programas que nel se regulan.

### Artigo 2º.- Ámbito de aplicación

A presente Ordenanza ten por obxecto regular o funcionamento do Servizo de Axuda no Fogar do Concello de Barreiros, sendo o ámbito de aplicación o territorio municipal de Barreiros.

### Artigo 3º.- Natureza, definición e obxectivos do servizo.

1.- O servizo de axuda no fogar é un servizo público de carácter local, consistente en ofrecer un conxunto de atencións ás persoas ou unidades de convivencia no propio domicilio, para facilitar o seu desenvolvemento e a permanencia no seu contorno habitual.

2.- Poderá prestarse, a calquera persoa ou unidade de convivencia, para as cales, de acordo coa valoración técnica correspondente, supoña un recurso idóneo de atención. De xeito particular, o servizo atenderá persoas maiores con déficits de autonomía e persoas con discapacidade, especialmente cando carezan de apoio persoal no seu medio inmediato.

3.- Este servizo ten por obxecto prestar un conxunto de atencións ás persoas no seu domicilio, dende unha perspectiva integral e normalizadora, naquelas situacións en que teñan limitada a súa autonomía persoal ou nos casos de destruturação familiar.

Son obxectivos do servizo de axuda no fogar:

- a) Mellorar a calidade de vida das persoas usuarias.
- b) Posibilitar a permanencia das persoas no seu contorno de convivencia habitual.
- c) Favorecer e potenciar a autonomía persoal no propio domicilio.
- d) Manter, mellorar e recuperar as redes de relación familiar e social.
- e) Previr situacións de dependencia ou exclusión social.
- f) Retardar ou evitar a institucionalización
- g) Reforzar a solidariedade e potenciar o voluntariado social.

### Artigo 4º.- Contido do servizo

De conformidade coa valoración técnica realizada en cada caso polos servizos sociais comunitarios do Concello de Barreiros, no marco do servizo de axuda no fogar poderán prestarse os seguintes tipos de atención:

#### 4.1 *Servizos de carácter básico:*

a) Atencións de carácter persoal na realización das actividades básicas da vida diaria, tales como:

- Asistencia para levantarse e deitarse.
- Tarefas de coidado e hixiene persoal, así como para vestirse.
- Control do réxime alimentario e axuda, se é o caso, para alimentarse.
- Supervisión cando proceda, das rutinas de administración de medicamentos prescritos por facultativos.
- Apoio para cambios posturais, mobilizacións, orientación espacio-temporal.
- Apoio a persoas afectadas por problemas de incontinencia.
- Outras tarefas para favorecer a atención integral da persoa usuaria.

b) Atencións de carácter persoal na realización doutras actividades necesarias da vida diarias, tales como:

- Seguimento das intervencións realizadas polo sistema sanitario.
- Apoio en trámites urxentes de carácter administrativo, xudicial e similares.

c) Atencións das necesidades de carácter doméstico e da vivenda, tales como:

- Limpeza e mantemento da hixiene e salubridade da vivenda.
- Compra de alimentos e outros produtos de uso común.
- Preparación dos alimentos.
- Lavado e coidado das pezas de vestir, así como do enxoval doméstico.
- Apoio á unidade familiar.

– Coidados e mantemento básico da vivenda

Este tipo de atención poderá ser facilitado en parte, se é o caso, por programas específicos de lavandaría ou alimentación a domicilio.

d.- Atencións de carácter psicosocial e educativo: intervencións técnico-profesionais formativas e de apoio ao desenvolvemento das capacidades persoais, á afectividade, á convivencia e á integración na comunidade así como á mellora da estruturación familiar.

4.2. Con carácter complementario, unha vez garantido o nivel básico de atención, o servizo de axuda no fogar poderá incorporar, entre outros, as seguintes actuacións e servizos:

- a) Actividades de acompañamento, socialización e desenvolvemento de hábitos saudables.
- b) Servizo de préstamo de axudas técnicas para persoas en situación de dependencia ou dependencia temporal. Para estes efectos enténdese por axuda técnica calquera produto, dispositivo, equipamento, instrumento, tecnoloxía ou software, fabricado especialmente ou dispoñible no mercado, para previr, compensar, controlar, mitigar ou neutralizar deficiencias ou limitacións na actividade e restricións na participación social das persoas.
- c) Prestación de atención a distancia mediante dispositivos de teleseguimento, teleasistencia e similares.
- d) Adaptacións funcionais do fogar.
- e) Servizo de podoloxía.
- f) Servizo de fisioterapia

4.3. Outros servizos.

Poderán integrarse, ademais, dentro do servizo de axuda no fogar, determinadas atencións e actividades que se desenvolvan fóra do marco do domicilio da persoa usuaria, sempre que, de acordo coa prescrición técnica sobre o contido do servizo, incidan de maneira significativa na posibilidade de permanencia no fogar e na mellora da autonomía e calidade de vida.

En todo caso e sen prexuízo da execución de todas as tarefas que se recollan no correspondente acordo de servizo, o conxunto de atencións do programa de axuda no fogar terá un carácter de reforzo e non substitutivo das propias capacidades da persoa usuaria ou doutras persoas do seu contorno inmediato, de maneira que se falicite e promova a súa autonomía.

4.4. Atencións excluídas do servizo.

En ningún caso poderán formar parte das actuacións desenvolvidas polo servizo:

- a) A realización de actividades domésticas, que non fosen incluídas no proxecto de intervención e no acordo de servizo.
- b) Actuacións, que polo seu carácter sanitario, deban en todo caso, ser realizadas por persoal facultativo, tales como poñer inxeccións (exceptuando as de insulina ou heparina) e/ou suministrar unha medicación que implique certo grao de especialización por parte de quen a administre.

**Artigo 5º.- Persoas destinatarias.**

O servizo de axuda no fogar estará aberto a todas as persoas ou unidades de convivencia para as que, de acordo coa valoración técnica correspondente, supoña un recurso idóneo de atención. De xeito particular, o servizo atenderá persoas maiores con déficits de autonomía e persoas con discapacidade, especialmente cando carezan de apoio persoal no seu contorno inmediato, así como fogares con menores, en que se observe a necesidade dunha intervención de carácter socioeducativo. Tamén poderá dar unha resposta preventiva e socializadora a diversas situacións de familias en risco de exclusión social.

En todo caso, darase prioridade de acceso ao servizo ás persoas que teñan un dereito recoñecido de atención dentro do sistema de autonomía e atención á dependencia, segundo a Lei 39/2006, do 14 de decembro de promoción da autonomía persoal e atención ás persoas en situación de dependencia.

Con carácter xeral, os posibles usuarios/as serán:

- Solicitantes que se atopen en situación de dependencia para a realización das actividades básicas da vida diaria, que vivan sós e/ou que carezan de familia no termo municipal. A dependencia ou incapacidade para a realización de tarefas e actividades básicas da vida diaria virá determinada mediante informe médico.
- Solicitantes que se atopen en situación de dependencia para a realización das actividades básicas da vida diaria que, aínda convivindo con familiares en primeiro grao por afinidade e/ou consanguinidade, ou tendo estes familiares no termino municipal, non podan ser atendidos por estes debido a causas xustificadas (ter outras cargas familiares, ter máis de 65 anos, padecer algún tipo de minusvalía que menoscabe a súa autonomía para o coidado do solicitante, precaria situación económica, traballo fóra do domicilio, non ter capacidade suficiente para a prestación de coidados) Estas causas deberán ser xustificadas mediante a documentación que lle será solicitada polos servizos sociais comunitarios.

- Familias en risco de exclusión social, principalmente cando haxa menores que precisen atención.
- Suxeitos ou familias que temporalmente se atopen nunha situación de incapacidade para a realización de actividades da vida diaria por enfermidade, accidente ...

Non poderán ser usuarios deste servizo aquelas persoas que poidan beneficiarse dun servizo similar por parte doutras entidades (MUFACE, ISFAS...)

#### **Artigo 6º.- Dereitos das persoas usuarias.**

As persoas usuarias do servizo, no marco do establecido no artigo 6 da Lei 13/2008 de Servizos Sociais de Galicia e, se é o caso, na lexislación vixente sobre o procedemento administrativo común, terán dereito:

1. A seren tratadas co respecto debido á súa dignidade, intimidade e autonomía.
2. A accederen e utilizaren o servizo en condicións de igualdade e non discriminación.
3. A recibiren unha atención individualizada e adaptada ás súas necesidades, coa calidade e duración determinadas en cada caso.
4. A recibiren unha información de xeito áxil, suficiente, veraz e comprensible sobre os recursos e as prestacións do sistema galego de servizos sociais, así como a que sexan asistidas e orientadas nos trámites necesarios de cara ao seu acceso aos demais sistemas de benestar social.
5. A teren asignada unha persoa profesional de referencia que actúe como interlocutora principal e que asegure a coherencia da intervención. Así mesmo, a recibiren información precisa e clara sobre as posibles modificacións sobrevidas durante a prestación do servizo.
6. A coñeceren a organización e o regulamento do servizo.
7. Ao tratamento confidencial dos seus datos de acordo co disposto na Lei orgánica 15/1999, do 13 de decembro, de protección de datos de carácter persoal.
8. A coñeceren a situación do seu expediente
9. A seren informadas, de maneira clara e precisa, sobre a intervención prevista e elixir libremente, dentro da capacidade de oferta do sistema e logo da valoración técnica, o tipo de medidas ou de recursos adecuados para o seu caso, así como a participar na toma de decisións que modifiquen o proceso de intervención acordado.
10. Á calidade dos servizos recibidos e a presentaren queixas e suxestións á persoa coordinadora do servizo.
11. Ao respecto dos seus dereitos lingüísticos, garantindo, en todo caso, o desenvolvemento da actividade do servizo dende a práctica dunha oferta positiva do idioma galego.

#### **Artigo 7º.- Deberes das persoas usuarias.**

As persoas usuarias, no marco dos deberes que con carácter xeral se establecen no artigo 7 da Lei 13/2008, de servizos sociais de Galicia, e, se é o caso, na lexislación vixente sobre o procedemento administrativo común, terán os seguintes deberes:

- 1.- Cumprir as normas, requisitos e procedementos para o acceso aos diferentes servizos.
- 2.- Facilitar a información precisa e veraz sobre as circunstancias determinantes para o acceso e utilización dos servizos, así como comunicar ao persoal de referencia, os cambios de circunstancias familiares, sociais ou financeiras que puideren resultar relevantes na asignación, modificación, suspensión ou extinción das prestacións ou servizos.
- 3.- Cumprir coas condicións do servizo, facilitando e colaborando na execución das tarefas do persoal ao seu cargo e poñendo á súa disposición, cando se trate dun servizo realizado no domicilio, os medios materiais necesarios.
- 4.- Colaborar co persoal encargado do seu caso, acudindo ás entrevistas programadas, seguindo as orientacións e participando no desenvolvemento das actividades incluídas no servizo, centro ou programa en función das súas capacidades e nos termos acordados en cada caso.
- 5.- Manter unha actitude positiva de colaboración coas persoas profesionais dos servizos sociais comunitarios, participando activamente no proceso pautado de mellora, autonomía persoal e inserción social.
- 6.- Facilitar e cooperar no seguimento, avaliación e inspección do servizo.
- 7.- Respetar a dignidade persoal e profesional das persoas que lles presten o servizo, así como respectar os límites das súas obrigas laborais.
- 8.- A comunicar, con dez días de antelación, en circunstancias ordinarias e previsibles, calquera ausencia temporal que puidese impedir ou dificultar a execución dos servizos que, se fose o caso, se prestasen no seu domicilio.

#### **Artigo 8º.- Causas de extinción e modificación do servizo.**

Son causas de extinción do servizo de axuda no fogar, as seguintes:

- a) A renuncia da persoa usuaria.
- b) O cambio de programa individual de atención ou do proxecto de intervención que implique un cambio de asignación de recurso e a súa incompatibilidade co servizo de axuda no fogar.
- c) Traslado definitivo da súa residencia a outro concello.
- d) Falecemento da persoa usuaria.
- e) Incumprimento reiterado dos deberes e obrigas establecidas para as persoas usuarias na prestación do servizo.
- f) A falta reiterada de pagamento do servizo.
- g) Desaparición das causas que motivaron a prestación do servizo.

Con carácter xeral, a alteración das circunstancias tidas en conta para a concesión do servizo, poderá dar lugar á modificación das condicións de prestación nas que fora concedido inicialmente. Os cambios de circunstancias, en calquera caso, deberán sustanciarse no expediente individual, mediante un novo informe social.

Cando se trate dun servizo público de axuda no fogar, asignado a persoas en situación de dependencia, na correspondente resolución de Programa Individual de Atención, consonte o establecido na Orde de 2 de xaneiro de 2012, de desenvolvemento do Decreto 15/2010, do 4 de febreiro, polo que se regula o procedemento para o recoñecemento do sistema para a Autonomía e Atención á Dependencia, o procedemento para a elaboración do Programa Individual de Atención e a organización e funcionamento dos órganos técnicos competentes, modificado polo Decreto 148/2011, do 7 de xullo, a incoación por parte da entidade titular do servizo, dun expediente de extinción ou modificación das condicións de prestación do servizo, deberá notificarse en todo caso ao órgano competente para ditar resolución de Programa Individual de Atención.

#### **Artigo 9º.- Causas de suspensión temporal do servizo ou redución horaria.**

Son causas de suspensión temporal do servizo, logo de tramitación do correspondente expediente e informe razoado do persoal técnico coordinador do servizo, que deberá incorporarse ao expediente persoal, as que seguen:

1. Ausencia temporal do domicilio: neste caso o servizo poderá suspenderse por un máximo de dous meses para os casos de usuarios dependentes. Para os casos de usuarios de libre concorrancia, será de tres meses, debendo acreditar a persoa usuaria as causas que motivan a súa ausencia. ( Axústase a orde do 19 de abril, art. 27 .Suspensión temporal).

2. Modificación temporal das causas que motivaron a necesidade do servizo: poderá suspenderse o servizo en tanto persista o cambio de circunstancias causante da suspensión, coa excepción das prazas vinculadas a un dereito exercido dentro do sistema de autonomía e a atención á dependencia, suposto no que se estará ao disposto na correspondente normativa reguladora.

Con respecto aos casos de libre concorrancia, cando por necesidades do servizo sexa necesario ampliar o número de usuarios e se consideren prioritarios outros casos en consideración das súas circunstancias persoais, sociais, sanitarias, económicas..., ou en función das disponibilidades económicas do exercicio poderase reducir a intensidade da prestación do servizo. Acordarase por Resolución de Alcaldía, previo informe da traballadora social do concello.

Procederase á revisión do número de horas prestadas a usuarios de libre concorrancia cando se detecte por parte da traballadora social do concello que o número de horas de servizo que se presta xa non proceden debido á modificación das circunstancias que motivaron a alta do servizo. O número de horas de prestación poderá incrementarse ou diminuír e será xustificado cun informe-proposta da traballadora social municipal que precederá a Resolución de Alcaldía que ditará a resolución da nova proposta de servizo.

## **CAPÍTULO II. DA PRESTACIÓN DO SERVICIO**

### **Artigo 10º.- Formas de prestación do servizo.**

O servizo público de axuda no fogar será prestado polo Concello de Barreiros ben directamente ou ben mediante as diversas modalidades de contratación da xestión de servizos públicos, regulados na normativa vixente sobre contratos do sector público, a través de entidades privadas debidamente autorizadas.

### **Artigo 11º.- Requisitos específicos.**

1. Existirá un profesional de referencia, que actuará como coordinador do servizo e que deberá estar en posesión dunha cualificación mínima de diplomatura universitaria / grado universitario en traballo social. No caso de que o número de persoas usuarias sexa menor de 50, o persoal técnico mínimo esixible será de 0,02 profesionais en cómputo de xornada completa por persoa usuaria. Nos demais casos aplicarase a seguinte táboa:

Número de persoas usuarias	Persoal técnico mínimo
50 a 99	1 técnico/a titulado/a xornada completa
100 a 199	2 técnicos/as titulados/as a xornada completa
200 a 399	3 técnicos/as titulados/as a xornada completa
Incrementos sucesivos	Por cada grupo de 200 persoas usuarias corresponderá un incremento de 1 técnico/a titulado/a a xornada completa

2. O persoal que presta atención directa nos domicilios das persoas usuarias estará formado por auxiliares de axuda no fogar, que, no caso de prestar o servizo a persoas en situación de dependencia valorada, deberán estar en posesión do título de formación profesional de grao medio de atención socio sanitaria ou equivalente, regulado no **Real decreto 1593/2011, do 4 de novembro**, ou en posesión do certificado de profesionalidade de atención socio sanitaria a persoas no domicilio ou equivalente, regulado no Real decreto 1379/2008, do 1 de agosto, polo que se establecen os certificados de profesionalidade da familia profesional de servizos socioculturais e á comunidade.

3. O seguimento da prestación do servizo nos domicilios das persoas usuarias realizarase polo persoal coordinador sempre que as circunstancias o fagan necesario e, como mínimo, con carácter bimensual. Da supervisión realizada quedará constancia no correspondente expediente individual. Mediante esta supervisión revisarase e axustarase, se fose o caso, o contido das prestacións expresado no proxecto de intervención e no acordo de servizo.

4. O departamento de servizos sociais do Concello de Barreiros, e de ser o caso a entidade prestadora en réxime privado do servizo, abrirá un expediente por cada persoa usuaria ou por cada unidade de convivencia á que presta o servizo, no cal constará cando menos:

- Un informe de avaliación inicial, asinado polo traballador/a social competente, responsable da coordinación do servizo de axuda no fogar.

- Un proxecto de intervención, asinado polo traballador/a social competente, segundo o anexo XII desta Ordenanza.

- Un acordo de servizo asinado entre o concello de Barreiros e a persoa usuaria, segundo o anexo XIV desta ordenanza.

- Informes de seguimento da prestación nos domicilios das persoas usuarias, que terán, como mínimo, un carácter bimensual ou extraordinarios, cando as circunstancias así o aconsellen.

En todo caso, o tratamento da información contida nos expedientes realizarase acordo coa Lei 15/1999, do 13 de decembro de protección de datos de carácter persoal.

#### **Artigo 12º.- Modalidades de acceso ao servizo, organización e procedemento.**

O acceso ao servizo de axuda no fogar producirase a través dos servizos sociais comunitarios, de acordo co seguinte:

1. O acceso será prioritario e directo para as persoas as cales, tendo recoñecida unha situación de dependencia, se lles asigne a axuda no fogar na correspondente resolución de programa individual de atención, e consonte a aplicación do programa de asignación de recursos, establecido no título II do Decreto 15/2010, do 4 de febreiro, polo que se regula o procedemento para o recoñecemento da situación de dependencia e do dereito ás prestacións do sistema para a autonomía e atención á dependencia, o procedemento para a elaboración do programa individual de atención e a organización e funcionamento dos órganos técnicos competentes. Para estes efectos, o Concello de Barreiros, cando sexa o caso, procederá a dar de alta as persoas en agarda, de acordo coa orde de prelación establecida no programa de asignación de recursos. As persoas para as que o programa individual de atención, determine o servizo de axuda no fogar como recurso principal ou idóneo terán, en todo caso, preferencia sobre aquelas ás que se lles asigne o servizo de axuda no fogar como respiro do cuidador.

2. Para as persoas que non teñan o recoñecemento da situación de dependencia, ou non as asista o dereito de acceso efectivo ao catálogo de servizos de atención á dependencia, segundo o calendario de implantación que se establece na Lei 39/2006, o acceso ao servizo, logo da prescrición técnica do profesional de referencia e de aplicación no baremo tal e como recolle o anexo, resolverase en réxime de libre concorrencia, segundo o seguinte procedemento:

a. Presentación da solicitude, segundo o anexo I desta ordenanza, dirixida ao Alcalde no Rexistro Municipal do Concello, acompañada da seguinte documentación:

I. Fotocopia do DNI da persoa beneficiaria do servizo e das persoas que convivan no mesmo domicilio, de ser o caso.

II. Fotocopia da tarxeta sanitaria da persoa solicitante

III. Certificado de convivencia

IV. Informe médico ou clínico sobre o seu estado de saúde

V. Certificado de discapacidade e/ou certificado do grao e nivel de dependencia, de ser o caso.

VI. Xustificantes de ingresos da persoa solicitante e do resto dos membros da unidade de convivencia: declaración da renda, certificados de pensións, nóminas, certificados de outros bens que posúan, xustificante de percepción de alugueiros ...

VII. Calquera outra documentación que se valore oportuna

En todo caso, o tratamento da información contida nos expedientes individuais realizarase de acordo coa normativa vixente en materia de protección de datos de carácter persoal.

As solicitudes incompletas contarán cun prazo de 10 días para emendar deficiencias, en caso de non facelo, serán arquivadas sen máis trámite tal como se establece na lexislación que regula o procedemento administrativo.

b. O prazo de presentación de solicitudes permanecerá aberto todo o ano.

c. As solicitudes presentadas serán valoradas polo/a traballador/a social dos servizos sociais comunitarios do Concello, que, unha vez realizada a correspondente visita domiciliaria, determinará, mediante o informe técnico, a idoneidade do servizo, así como a intensidade recomendable para cada caso concreto, tendo en conta todas as circunstancias de necesidade e a aplicación do baremo establecido a tal fin, segundo anexo XIII.

d. O departamento de Servizos Sociais elaborará un informe-proposta que será elevado ó órgano competente para ditar resolución. O prazo máximo para resolver será de tres meses. No caso de que sexa favorable, a mesma terá a consideración de alta no servizo. En caso de non existir dispoñibilidade, a solicitude pasará a integrarse na lista de agarda, nunha orde de prioridade determinada pola puntuación que obtívese na aplicación do baremo. No caso de empate de puntuación, atenderase por orde temporal da demanda.

e. Cando concorran circunstancias que aconsellen a intervención inmediata do servizo, o procedemento poderase acurtar. A Alcaldía resolverá o expediente, á vista do informe-proposta do/a traballador/a social. Este informe conterá as causas que motiven a tramitación pola vía de urxencia. O procedemento de urxencia terá validez mentres se manteña a situación desencadeante. A desaparición desta levará consigo a extinción do servizo e tramitación pola vía ordinaria.

f. Para o inicio da prestación do servizo será requisito previo asinar o acordo da prestación do servizo, a modo de compromiso de respecto ás normas do servizo, ás tarefas a realizar, horarios, días e contribución económica correspondente ou gratuidade se procede, segundo o modelo establecido no anexo XIV desta ordenanza.

g. Denegación do servizo: as solicitudes de prestación do servizo de axuda no fogar poderán ser denegadas polo seguinte:

- Non reunir os requisitos de acceso establecidas na presente ordenanza.

- Non acadar 50 puntos da puntuación total establecida na presente ordenanza (nas solicitudes de libre concurrencia).

h. Revisión do servizo: nos prazos ou datas que se especifiquen no correspondente proxecto de intervención, ou sempre que se produzan circunstancias que varíen as que deron motivo a dita concesión, o/a traballador/a social procederá a revisar os casos nos que se estea prestando o servizo, e se o considerase oportuno, poderán propoñer modificacións na prestación do servizo mediante informe debidamente motivado. A variación do servizo realizarase mediante resolución ou acordo do órgano competente, debidamente motivado, previa audiencia nos casos en que as modificacións coincidisen coas solicitadas polos propios interesados ou nos casos en que sexan necesarias modificacións do servizo por razón de urxencia, debidamente motivadas, sen prexuízo da notificación das resolucións ou acordos mediante as que se adopten as mencionadas modificacións ós usuarios do servizo afectados. Así mesmo, será revisable polo Concello a condición de beneficiario cando:

- O interesado comunique que as circunstancias de feito e/ou de dereito que motivaron a concesión se modificaron.

- Existen dúbidas razoables de que puido haber modificacións das circunstancias persoais, familiares, económicas ou doutra índole, non comunicadas polo interesado. Neste caso, será preceptiva a audiencia ó interesado.

- Se deriven límites que necesariamente se desprendan de criterios de dispoñibilidade orzamentaria.

Anualmente, farase unha revisión de todas as persoas beneficiarias do servizo, co fin de comprobar que cumpre as condicións para a continuidade do mesmo. Para a renovación anual do servizo, as persoas beneficiarias deberán presentar a documentación establecida no apartado a) deste artigo, agás aquela que xa conste no seu expediente individual.

Todos os solicitantes que accedan ó servizo por libre concorrencia deberán estar empadroados no termo municipal de Barreiros.

Será requisito imprescindible para a prestación do servizo ter residencia efectiva nunha vivenda, en calquera réxime de tenencia que cumpra cos requisitos mínimos de habitabilidade que posibiliten a prestación efectiva e en condicións dignas do servizo.

### **Artigo 13º.- Desenvolvemento da prestación do servizo.**

1. O prazo de alta no servizo, será como máximo dunha semana, dende que a persoa usuaria se lle asigna o recurso dende o Programa de Asignación de Recursos para as persoas que acceden ao servizo na modalidade de dependencia, ou dende que se aproba a súa solicitude pola Xunta de Goberno Local, para as persoas que acceden ao servizo na modalidade de libre concorrencia. Para as persoas usuarias ás que se lles concede o servizo, pola vía de urxencia, o prazo de alta será como máximo de dous días.

2. Consideraranse casos de extrema e urxente necesidade aqueles nos que o solicitante non teña familiares ou viva só, e se dean as seguintes circunstancias:

- Se presente a necesidade de forma imperativa.
- Sexan situacións de alto risco.
- Falecera o cónxuxe ou outra persoa que estivera facéndose cargo do beneficiario.
- Outras causas semellantes.

3. O inicio da prestación por vía de urxencia non eximirá, en todo caso da tramitación do expediente de solicitude do servizo, de acordo co procedemento establecido anteriormente, aínda que xa estea iniciada a presentación do servizo. O órgano municipal competente, unha vez tramitado o expediente, poderá modificar o servizo, como consecuencia do que resulte do citado expediente.

4. Previo ao inicio do servizo, o persoal técnico realizará unha avaliación da situación e establecerá un consenso coa persoa usuaria, sobre as actuacións e tarefas a desenvolver no domicilio. Procederá a designar a persoa profesional de referencia.

5. A asignación do persoal de atención directa farase en base ó perfil requirido para cada caso concreto. Realizarase unha visita domiciliar para a presentación do persoal de atención directa á persoa usuaria.

Se a persoa beneficiaria, rexeita ao/á auxiliar de axuda no fogar que se lle asigna, sen razón suficientemente xustificada, pasará á lista de espera ata que se lle asigne outro/a auxiliar, sempre que sexa tecnicamente posible.

Os cambios no persoal técnico asignado, así como nos horarios de prestación do servizo, que deban efectuarse, por circunstancias de necesidades de organización do servizo, comunicaranse á persoa beneficiaria, seguindo en vigor o acordo asinado.

6. Para o inicio da prestación do servizo, será requisito previo, asinar o documento de inicio da prestación do servizo, segundo o modelo establecido no anexo XIV desta ordenanza.

7. O persoal técnico elaborará un proxecto de intervención, segundo o anexo XII desta ordenanza (anexo II da Orde do 22 de xaneiro de 2009), que deberá conter: días da semana de atención, horario concreto no que se desenvolverá a prestación, identidade do persoal de atención directa responsable da execución do proxecto, obxectivos e tarefas a desempeñar no domicilio, seguimento efectivo da prestación no domicilio do usuario, con carácter mínimo bimensual.

8. Farase entrega á persoa usuaria dunha copia da ordenanza municipal de axuda no fogar, debidamente visada polo órgano competente.

9. Farase entrega á persoa usuaria e ao persoal de atención directa, do documento que conteña as tarefas a desenvolver no domicilio.

10. Informarase ás persoas usuarias da existencia dun libro de reclamacións, que estará á súa disposición, para calquera queixa ou reclamación. No caso de queixa ou reclamación, facilitarase unha copia da queixa á persoa usuaria e remitirase o orixinal ao servizo de inspección no prazo de tres días, xunto cun informe do caso.

### **Artigo 14º.- Intensidade na prestación do servizo.**

A intensidade do servizo determinarase, con carácter xeral, en horas mensuais de atención, distribuídas en función das necesidades da persoa usuaria e do informe técnico.

A intensidade do servizo de axuda no fogar para as persoas atendidas no marco do sistema de autonomía persoal e atención á dependencia estará predeterminada no seu programa individualizado de atención. A súa aplicación horaria será flexible e conforme co proxecto de intervención, de xeito que, cando menos, se garanta a cobertura das necesidades de atención de carácter persoal na realización das actividades básicas da vida diaria (relacionadas no artigo 4.1º, da Orde de 22 de xaneiro de 2009, pola que se regula o servizo de axuda no fogar) todos os días da semana.

Nos restantes casos ( libre concurrencia), a intensidade do servizo virá determinada na prescrición efectuada polos correspondentes servizos sociais comunitarios e terá unha intensidade de atención non superior a 40 h/mes. Establécese como período semanal para a prestación destas horas de luns a venres, quedando excluídas as fins de semana, festivos e horario nocturno. Para casos debidamente xustificadas e de extrema necesidade, este horario poderá variar, sempre que así sexa valorado pola traballadora social do concello.

**Artigo 15º.- Protocolo para o inicio da prestación efectiva e establecemento do vínculo entre a/o auxiliar de axuda no fogar e a persoa usuaria do servizo.**

- Unha vez recollida a documentación necesaria para unha nova alta no servizo de axuda no fogar, efectuado visita domiciliaria para cumprimentación do baremo e elaboración do proxecto individualizado de atención, emitido informe-proposta para a Xunta de Goberno Local e resolto favorablemente por esta, poñémonos en contacto co usuario/a para comunicar por escrito o inicio da prestación do servizo e concretar o comezo.
- O contacto inicial tras a aprobación facémolo mediante visita domiciliaria (previamente concertada telefonicamente) para concretar por escrito o acordo de servizo, o proxecto individualizado de atención e a relación detallada de actividades a desenvolver (deixamos copia ó usuario dos tres documentos).
- Así mesmo, concertamos entrevista no departamento ca/co auxiliar de axuda no fogar para entregar o proxecto individualizado de atención e explicar as actividades a desenvolver no domicilio da/o usuario e efectuamos a visita domiciliaria ca/co mesmo para presentarlle/a e establecer o vínculo ca/co mesmo.
- Posteriormente comeza o servizo o día e no horario pactado.

**Artigo 16º.- Protocolo de actuación no caso de urxencias.**

- O usuario/a ou persoa do entorno demanda a urxencia en entrevista no departamento de servizos sociais.
- No mesmo día (de ser posible) realízase visita domiciliaria ó usuario que solicita a urxencia para elaborar o correspondente baremo e proposta técnica. De ser favorable emítese informe-técnico de urxencia e resólvese mediante resolución de alcaldía.
- No menor tempo posible efectúase visita domiciliaria ca/co auxiliar de axuda no fogar correspondente , concertando o proxecto individualizado de atención con usuario e auxiliar e asinarase o acordo de servizo.
- Posteriormente dará comezo o servizo no horario e día pactado, sendo o prazo de alta como máximo de dous días dende que se demanda a urxencia.
- Cando sexa posible, recollerase a documentación necesaria para ratificar o expediente de alta na Xunta de Goberno Local.

**Artigo 17º.- Protocolo de actuación no caso de incidencias.**

- Unha vez se comunican as incidencias á correspondente coordinadora, a parte ou partes implicadas na mesma cobren o parte correspondente e entréganllo á coordinadora do servizo.
- Esta revisa o parte/s, facendo un estudo e valoración do caso con visita da Traballadora Social ó domicilio do usuario (de ser necesaria) e elabora o correspondente informe que presenta a Xunta de Goberno Local ou o responsable superior da entidade.
- De considerarse procedente, o informe conterá as medidas adoptadas para a solución da incidencia.
- O órgano competente dará traslado da resolución que estime oportuna. E, si é o caso, farase efectiva no prazo que se dite na mesma.

**Artigo 18º.- Protocolo de substitución da persoa auxiliar de axuda no fogar e de cesación do servizo.**

Respetaránse as auxiliares que prestan o servizo na medida do posible e no caso de substitución farase tendo en conta a vontade do usuario e o perfil máis axeitado para a substitución.

SUSTITUCIÓN TEMPORAL PREVIAMENTE PROGRAMADA: Cando sexan programadas avisarase con antelación ao usuario e chegarase a un acordo con el sobre o cambio (No caso de vacacións, de disfrute de días de asuntos propios, de baixas médicas previstas, ou similar).

- Efectúamos visita domiciliaria de ser necesario ou, no seu defecto, comunicámolo mediante chamada telefónica para explicar o motivo polo cal se vai proceder a efectuar un cambio de auxiliar de axuda no fogar.
- No caso de que a auxiliar de axuda no fogar non coñeza ó usuario efectúase visita domiciliaria para presentar á mesma e de ser posible e sempre que o servizo o permita prestará o servizo un día coa auxiliar que xa o viña a prestar para unha boa adaptación no domicilio.
- Entrégase relación de actividades á auxiliar suplente (no caso de vacacións e baixas médicas) e novo proxecto individualizado de atención á auxiliar e usuario no caso de reorganizacións internas do servizo.

SUSTITUCIÓN TEMPORAL NO CASO DE URXENCIAS/INCIDENCIAS DIARIAS: (No caso de consultas médicas de auxiliares, de enfermidades, de incidencias familiares de auxiliares, etc ....).

- Primeiro comunícalle o usuario a substitución da auxiliar explicando o motivo.
- Comunícase á auxiliar encargada de cubrir a incidencia o domicilio do usuario e as actividades a desenvolver no mesmo entregando copia e ficha para a correspondente cumprimentación da mesma.
- Se non coñece ó usuario acompáñase ó domicilio do mesmo e explícase as actividades a desenvolver. De coñecer ó usuario non é necesaria a visita domiciliaria por parte da coordinadora.

SUSTITUCIÓN PERMANENTE PREVIAMENTE PROGRAMADA (No caso de reorganizacións internas do servizo, ben sexa a petición do usuario por modificacións de horario ou por necesidades internas do servizo).

- Efectúamos visita domiciliaria de ser necesario ou, no seu defecto, comunicámolo mediante chamada telefónica para explicar o motivo polo cal se vai proceder a efectuar un cambio de auxiliar de axuda no fogar.
- No caso de que a auxiliar de axuda no fogar non coñeza ó usuario efectúase visita domiciliaria para presentar á mesma e de ser posible e sempre que o servizo o permita prestará o servizo un día coa auxiliar que xa o viña a prestar para unha boa adaptación no domicilio.
- Entrégase relación de actividades á auxiliar suplente e novo asíñase novo proxecto de intervención coa auxiliar e co usuario.

**CESACIÓN DO SERVIZO:** comunícaselle o usuario e tamén a auxiliar para que deixe de acudir.

O servizo de axuda no fogar para os usuarios de libre concorrència poderá cesar por reorganización do servizo en función da das dispoñibilidades económicas do exercicio.

**Artigo 19º.-** Protocolo de actuación no caso de queixa no libro de reclamacións.

I. A entidade ten a disposición dos usuarios do Servizo de Axuda no Fogar un libro de reclamacións, informando as persoas usuarias da existencia do mesmo.

II. No caso de queixa ou reclamación, facilitarase unha copia da queixa á persoa usuaria e remitirase o orixinal ao servizo de inspección no prazo de tres días, xunto con un informe do caso, segundo establece o artigo 6.i) do Decreto 254/2011, do 23 de decembro, polo que se regula o réxime de rexistro, autorización, acreditación e a inspección dos servizos sociais de Galicia.

### **CAPITULO III. RÉXIME ECONÓMICO E FINANCIERO**

**Artigo 20º.-** Determinación da capacidade económica do sistema de atención a persoas usuarias da dependencia.

1.A capacidade económica das persoas dependentes, valoradas con dereito recoñecido de atención, mediante o servizo de axuda no fogar, calcularase de acordo coas normas de valoración contidas no capítulo II do título III do Decreto 149/2013, do 5 de setembro, polo que se define a carteira de servizos sociais para a promoción da autonomía persoal e a atención ás persoas en situación de dependencia e se determina o sistema de participación das persoas usuarias no financiamento do seu custo, observándose as normas de aplicación á materia, vixentes en cada momento, polo órgano competente en materia de servizos sociais da Xunta de Galicia .

2. O resultado do cálculo da capacidade económica, correspondente ás persoas dependentes valoradas con dereito de atención recoñecido no servizo de axuda no fogar, constará na resolución do plan individualizado de atención que se desenvolva en cada caso, de conformidade co que establece o artigo 38 do Decreto 15/2010, do 4 de febreiro, polo que se regula o procedemento para o recoñecemento da situación de dependencia e do dereito ás prestacións do sistema para a autonomía e atención á dependencia, o procedemento para a elaboración do programa individual de atención e a organización e funcionamento dos órganos técnicos competentes”.

**Artigo 21º.-** Determinación da capacidade económica das persoas usuarias do servizo de axuda no fogar de libre concorrència e doutros servizos que impliquen copagamento.

A determinación da capacidade económica das persoas usuarias doutros servizos en que se aplique o copagamento, efectuarase segundo o establecido no artigo 60.1 do Decreto 99/2012, do 16 de marzo, polo que se regulan os servizos sociais comunitarios e o seu financiamento, que establece:

“1. No servizo de axuda no fogar prestado a persoas ou unidades de convivencia distintas ás referidas no artigo anterior, o cómputo da capacidade económica farase de acordo cos seguintes criterios:

a) Computarase a renda de todas as persoas residentes na mesma unidade de convivencia. Para estes efectos considérase renda a suma de calquera das modalidades de ingreso a que se refire o artigo 6.2 da Lei 35/2006, do 28 de novembro, do imposto sobre a renda das persoas físicas.

b) Computarase, así mesmo, o patrimonio neto de todas as persoas residentes na unidade de convivencia. Para estes efectos, enténdese por patrimonio neto o conxunto de bens e dereitos de contido económico de que sexan titulares, determinados consonte as regras de valoración recollidas na Lei 19/1991, do

6 de xuño, do imposto sobre o patrimonio, con dedución das cargas e gravames de natureza real que diminúan o seu valor, así como das débedas e obrigas persoais das cales deba responder. Igualmente, para o cómputo do patrimonio neto deberán terse en conta as exencións que prevé a Lei 19/1991, do 6 de xuño, do imposto sobre o patrimonio, ao respecto da vivenda habitual e doutros bens e dereitos.

c) A capacidade económica calcularase sumando todas as rendas computables, modificadas á alza pola suma dun 5% do patrimonio neto en cómputo anual, e dividindo o resultado da dita suma entre o total de persoas que convivan no fogar”.

**Artigo 22º.- Participación no financiamento do servizo das persoas dependentes con dereito de atención recoñecido como usuarias do servizo de axuda no fogar.**

1. No caso de que a capacidade económica da persoa usuaria do servizo de axuda no fogar para persoas dependentes valoradas con dereito de atención recoñecido sexa igual ou inferior ao indicador público de rendas a efectos múltiples (IPREM), quedará exenta da obriga de participar no custo do servizo.

2. Nos demais supostos, aplicarase a seguinte táboa, na cal se expresa o copagamento en termos de porcentaxe sobre a capacidade económica da persoa usuaria e en función da intensidade do servizo asignado:

Capacidade económica (referenciada ao IPREM) Ata	Grao I	Grao II	Grao III
	<=20 h	<=45 h	<=70 h
100,00 %	0,00 %	0,00 %	0,00 %
115,00 %	4,52 %	9,61 %	14,70 %
125,00 %	5,41 %	11,50 %	17,58 %
150,00 %	5,55 %	11,79 %	18,03 %
175,00 %	5,65 %	12,00 %	18,35 %
200,00 %	5,72 %	12,16 %	18,60 %
215,00 %	5,81 %	12,34 %	18,87 %
250,00 %	6,03 %	12,82 %	19,61 %
300,00 %	6,24 %	13,26 %	20,29 %
350,00 %	6,42 %	13,63 %	20,85 %
400,00 %	6,54 %	13,90 %	21,25 %
450,00 %	6,63 %	14,09 %	21,55 %
500,00 %	6,70 %	14,25 %	21,79 %
>500 %	6,76 %	14,36 %	21,97 %

3. Nos casos en que, por renuncia parcial expresa da persoa beneficiaria ao seu dereito de atención co número de horas expresadas no PIA, ou cando por tratarse dun suposto de compatibilización do SAF con outro servizo ou prestación do catálogo as horas reais prestadas de servizo de axuda no fogar sexan inferiores á cantidade expresada en cada columna da táboa anterior para o grao e nivel correspondente, a cantidade a pagar será minorada proporcionalmente á diminución das horas efectivas de servizo.

4. En ningún caso, o importe da participación económica que deberá ingresar a persoa beneficiaria en concepto de copagamento, poderá exceder o **90%** do custo do servizo determinado en termos de prezo/hora.

5. No caso das atencións e servizos complementarios do nivel básico do servizo de axuda no fogar, prestados ás persoas dependentes valoradas con dereito de atención recoñecido, para os efectos de facer efectiva a obriga de participar no custo do servizo por parte das persoas usuarias, aplicarase a seguinte táboa, na cal se expresa a súa participación en termos de porcentaxe sobre a capacidade económica da persoa usuaria e en función da intensidade e do tipo de atención ou servizo asignado:

% Capacidade económica (referenciada ao IPREM) Ata	Grao I			Grao II			Grao III		
	Adaptacións funcionais do fogar, podoloxía, fisioterapia	Actividades de acompañamento, socialización e desenvolvemento de hábitos saudables	Servizo de préstamo de axudas técnicas	Adaptacións funcionais do fogar, podoloxía, fisioterapia	Actividades de acompañamento, socialización e desenvolvemento de hábitos saudables	Servizo de préstamo de axudas técnicas	Adaptacións funcionais do fogar, podoloxía, fisioterapia	Actividades de acompañamento, socialización e desenvolvemento de hábitos saudables	Servizo de préstamo de axudas técnicas
	<=15			<=28			<=45		
100,00 %	0,00 %	12,87 %	13,76 %	0,00 %	22,73 %	24,29 %	0,00 %	35,51 %	37,95 %
115,00 %	5,98 %	13,10 %	14,00 %	10,56 %	23,12 %	24,71 %	16,50 %	36,13 %	38,61 %
125,00 %	7,15 %	13,39 %	14,31 %	12,63 %	23,64 %	25,26 %	19,73 %	36,94 %	39,47 %
150,00 %	7,34 %	13,52 %	14,44 %	12,95 %	23,87 %	25,50 %	20,24 %	37,29 %	39,85 %
175,00 %	7,47 %	13,61 %	14,54 %	13,18 %	24,03 %	25,67 %	20,60 %	37,54 %	40,12 %
200,00 %	7,57 %	13,76 %	14,70 %	13,36 %	24,29 %	25,96 %	20,87 %	37,96 %	40,56 %
215,00 %	7,68 %	13,83 %	14,78 %	13,56 %	24,42 %	26,09 %	21,18 %	38,16 %	40,77 %
250,00 %	7,98 %	13,96 %	14,91 %	14,09 %	24,64 %	26,33 %	22,01 %	38,50 %	41,14 %
300,00 %	8,25 %	14,06 %	15,02 %	14,57 %	24,82 %	26,52 %	22,77 %	38,78 %	41,44 %
350,00 %	8,48 %	14,16 %	15,13 %	14,98 %	25,00 %	26,72 %	23,40 %	39,07 %	41,74 %
400,00 %	8,65 %	14,35 %	15,33 %	15,27 %	25,33 %	27,06 %	23,85 %	39,57 %	42,29 %
>400,00 %	8,77 %	14,48 %	15,48 %	15,48 %	25,57 %	27,32 %	24,19 %	39,95 %	42,69 %

**Artigo 23º.- Participación das persoas usuarias no financiamento do servizo de axuda no fogar das persoas usuarias que accedan por libre concorrència.**

1.- O prezo do servizo de axuda no fogar tomará como base o custo da hora de servizo para o Concello, ou, no seu caso, a tarifa hora establecida no contrato coa empresa que preste o servizo, coas revisións anuais que sexan precisas. Determinarase en todo caso anualmente e comunicaráselle aos usuarios unha vez finalizada a revisión anual dos casos.

2.- Para o servizo de axuda no fogar en réxime de libre concorrència, para as persoas que non teñan o recoñecemento da situación de dependencia, ou non as asista o dereito de acceso efectivo ao catálogo de servizos de atención á dependencia, segundo o calendario de implantación que se establece na Lei 39/2006, aplicarase a seguinte táboa que regula unha progresiva participación económica no custo do servizo en base ó cálculo da capacidade económica per cápita, de acordo co establecido no artigo 20 desta ordenanza.

CAPACIDADE ECONÓMICA	Participación no custe do servizo de SAF básico
<i>Menor do 0,80 IPREM</i>	0%
<i>Maior do 0,80 do IPREM e menor ou igual a 1 do IPREM</i>	10 %
<i>Maior do 1 do IPREM e menor ou igual a 1,25 do IPREM</i>	15%
<i>Maior do 1,25 do IPREM e menor ou igual a 1,50 do IPREM</i>	20%
<i>Maior do 1,50 do IPREM e menor ou igual a 1,75 do IPREM</i>	30%
<i>Maior do 1,75 do IPREM e menor ou igual a 2 do IPREM</i>	40%
<i>Maior do 2 do IPREM e menor ou igual a 2,25 do IPREM</i>	50 %
<i>Maior de 2,25 e menor ou igual a 2,50 do IPREM</i>	60 %
<i>Maior de 2,5 do IPREM</i>	70 %

3.- Sen prexuízo do anterior, poderán establecerse excepcións aos criterios xerais do referido copagamento nos casos en que a situación causante da aplicación do servizo de axuda no fogar sexa unha problemática de desestructuración familiar, exclusión social ou pobreza infantil, circunstancia que deberá estar debidamente xustificada no correspondente informe social.

4.- En calquera caso, establecerase un límite máximo de participación económica das persoas usuarias do 40 % da súa capacidade económica.

#### **Artigo 24º.- Afectación dos ingresos municipais polo copagamento dos servizos.**

De conformidade co artigo 56.7 de Lei 13/2008, de servizos sociais de Galicia, en todo caso, os ingresos que recade o Concello de Barreiros, en concepto de achega das persoas usuarias para a súa participación no custo dos servizos sociais comunitarios, estarán afectados ao financiamento dos servizos sociais que reciban.

#### **Artigo 25º.- Da coordinación coas entidades privadas que atendan a persoas usuarias financiados total ou parcialmente con fondos públicos:**

No caso das entidades privadas que presten o SAF mediante financiamento total ou parcial con fondos públicos, ou que atendan a persoas usuarias derivadas do sistema de autonomía persoal e atención á dependencia, manterán unha coordinación efectiva cos servizos sociais comunitarios básicos, establecendo un protocolo de comunicación de altas no servizo de cada persoa usuaria, así como unha copia actualizada do correspondente proxecto de intervención e dos informes de seguimento, dirixidos aos servizos sociais comunitarios básicos do concello ou entidade local.

#### **Artigo 26º.- Obrigados ó pagamento.**

Están obrigados ó pagamento do prezo público regulado nesta ordenanza, as persoas usuarias beneficiarias do servizo prestado por este concello ás que se refire o artigo 5 da presente ordenanza.

#### **Artigo 27º. Nacemento da obriga de pago.**

A obriga de pagar os prezos públicos regulados neste acordo regulador, nace, en xeral, dende que se incie a prestación do servizo e deberá facerse efectivo o acordo coas seguintes normas de xestión:

Os prezos públicos contemplados nesta ordenanza satisfaranse con carácter posterior á prestación do servizo e con carácter específico, durante a primeira quincena do mes seguinte.

Por parte do Concello e sobre a base do parte de traballo asinado, conxuntamente pola persoa usuaria e polo persoal de atención directa, elaborárase un recibo individual co importe correspondente ó servizo prestado no mes anterior, que se remitirá á entidade bancaria elixida pola persoa beneficiaria para que se efectúe o pagamento.

#### **Artigo 28º.- Infraccións e sancións.**

As infraccións e sancións rexeranse, no relativo ao pagamento, pola Lei 58/2003, do 17 de decembro, xeral tributaria e polo Real Decreto 939/2005, do 29 de xullo, polo que se aproba o Regulamento Xeral de Recadación, e no resto das materias, polo disposto na Lei 13/2008, de 3 de decembro, de servizos sociais de Galicia e Decreto 254/2011, do 23 de decembro, polo que se regula o réxime de rexistro, autorización, acreditación e a inspección dos servizos sociais en Galicia .

#### **DISPOSICIÓN ADICIONAIS.**

##### **Primeira.- Normativa subsidiaria.**

No non previsto expresamente na presente Ordenanza, estarase ao disposto na Lei 13/2008, de 3 de decembro, de servizos sociais de Galicia; Orde do 22 de xaneiro de 2009 pola que se regula o servizo de axuda no fogar; Decreto 99/2012, do 16 de marzo, polo que se regulan os servizos sociais comunitarios e o seu financiamento e Decreto 149/2013, de 5 de setembro, polo que se define a carteira de servizos sociais para a promoción da autonomía persoal e a atención ás persoas en situación de dependencia e se determina o sistema de participación das persoas usuarias na financiación do seu coste.

##### **Segunda.- Revisión de oficio.**

Queda facultada a Alcaldía ou concellaría delegada do Concello de Barreiros para ditar cantas instrucións resulten precisas para a adecuada interpretación e aplicación desta Ordenanza.

#### **DISPOSICIÓN TRANSITORIA.**

A aplicación desta ordenanza require un período de transición, en tanto en canto non se realice a oportuna revisión de cada expediente das persoas usuarias do SAF para regularizar a prestación do servizo de acordo coa nova ordenanza.

#### **DISPOSICIÓN DERROGATORIA.**

Esta ordenanza deroga expresamente a ordenanza reguladora do servizo de axuda no fogar do Concello de Barreiros aprobada polo Pleno da Corporación en data 5 de agosto de 2013 e publicada no BOP de Lugo de data 8 de outubro de 2013, agas os anexos da mesma que continúan vixentes.

**DISPOSICIÓN DERRADEIRA.**

A presente Ordenanza entrará en vigor unha vez publicada integramente no Boletín Oficial da Provincia de Lugo e transcorrido o prazo previsto nos artigos 65.2 e 70.2 da Lei Reguladora das Bases do Réxime Local (LRBRL).

Barreiros, 18 de marzo de 2014.- O Alcalde, J. Alfonso Fuente Parga

R. 1130

---

*Anuncio*

Conforme dispoñen os artigos 112 da Lei 7/85 de 2 de abril, e 169 do RD lexislativo 2/2004, polo que se aproba o Texto Refundido da Lei Reguladora das Facendas Locais, encontrase exposto ó público, a efectos de reclamacións, o Orzamento Xeral da Entidade para o exercicio 2014 aprobado inicialmente polo Pleno da Corporación en sesión celebrada o 17 de marzo de 2014.

Os interesados que estean lexitimados segundo o disposto no artigo 170.1 do RD lexislativo 2/2004, a que se fixo referencia, e polos motivos taxativamente numerados no artigo 170.2, poderán presentar reclamacións nos quince días hábiles a partir do seguinte á data de publicación deste anuncio no Boletín Oficial da Provincia.

En Barreiros a 18 de marzo de dous mil catorce.- O Alcalde, J. Alfonso Fuente Parga

R. 1131

---

*Anuncio*

No Pleno extraordinario celebrado o día 17 de marzo de 2014 tomouse o seguinte acordo:

Fixanse as retribucións a percibir polo exercicio con dedicación exclusiva do cargo de Alcalde, na contía de corenta mil euros (40.000 €) brutos anuais, en doce mensualidades, máis dúas pagas extraordinarias, nos meses de xuño e decembro, todas elas de idéntico importe, e a correspondente inclusión no Réxime Xeral da Seguridade Social, asumindo a Corporación o pago das cotas empresariais correspondentes.

Barreiros, 18 de marzo de 2014.- O alcalde, Jose Alfonso Fuente Parga.

R. 1132

---

*Anuncio*

Por Acordo Plenario de data de 27 de xaneiro de 2014, aprobouse inicialmente a **“Ordenanza fiscal do prezo público pola venda de libros, publicacións, material promocional e pola realización de actividades, xornadas, seminarios, cursos ou similares”** e, ó non terse presentado reclamacións durante o período de información pública, a aprobación provisional adquire o carácter de DEFINITIVA, polo que, de conformidade co artigo 70.2 da Lei 7/85, de 2 de abril, Reguladora das Bases de Réxime Local, procedese á publicación do texto íntegro para a súa entrada en vigor:

**“ORDENANZA FISCAL POLO PREZO PÚBLICO POLA VENDA DE LIBROS, PUBLICACIÓNS, MATERIAL PROMOCIONAL E POLA REALIZACIÓN DE ACTIVIDADES, XORNADAS, SEMINARIOS, CURSOS OU SIMILARES.**

**Artigo 1.- Fundamento e natureza.**

De conformidade co previsto no artigo 127, en relación co artigo 47, do Real Decreto 2/2004, de 5 de marzo, polo que se aproba o texto refundido da Lei Reguladora das Facendas Locais, establécese o prezo público pola venda de libros, publicacións, material promocional, a celebración de xornadas ou cursos e a realización de actividades culturais e lúdicas ou similares.

**Artigo 2.- Concepto**

O prezo público regulado nesta ordenanza constitúe unha prestación patrimonial de carácter público que se satisfará polos usuarios que voluntariamente adquiren os libros, publicacións ou material promocional, e os que participan nas prestacións dos servizos ou a realización de actividades desenvolvidas nas xornadas ou cursos e a realización de actividades desenvolvidas nas xornadas ou cursos e a realización de actividades culturais e lúdicas ou similares.

**Artigo 3.- Obrigados ó pago.**

Están obrigados ó pago do prezo público regulado nesta ordenanza:

- Os que adquiren os libros, publicacións e material promocional.